

Prozesuari begira zein «gauza ezberdin» egin daitekeen galdegin dio Aznarrek Almuniari

Kexu agertu da PSOEko buruaren eta Arzalluzen bileraren berri ez duelako


Agentziak / Donostia

Euskal Herrian abiatutako prozesu politikoaren aurrean Espainiako Gobernuak duen jarrerari buruz Joaquín Almunia aste honetan esandakoei erantzun zien atzo Jose Mari Aznar presidenteak. «Abantaila politikorik» ez dutela lortuko gogorarazi die Almunia eta Arzalluzi, eta Gobernuak orain artean «egin ez duen zer» egin dezakeen argitzea galdegin.

JOSE MARI AZNAR Espainiako presidenteak atzo erantzun zien Joaquín Almunia aste honetan Espainiako Gobernuari prozesu politikoaren inguruan luzatutako kritikei. PSOEko idazkari nagusiak PPrene Gobernuaren «inmobilismoa» gaitzetsi zuen Xabier Arzalluzekin bildu ondoren, eta Euskal Herrian abiatutako prozesu politikoari begira «gauza ezberdinak» egin daitezkeela gaineratu.

«Norbaitek zerbait ezberdina egin edo esateko baldin badu, azal dezala egiten ari garenez gain zer egin daitekeen», ihardetsi zuen Aznarrek. «Ostera, inolako berririk ez dut jaso Almunia eta Arzalluzek burututako bileraz», gehitu zuen segidan. Indar politikoaren artean hitz egiteari ondo deritzola azaldu zuen, «arrazoizkoa baita, baina nik nire ardura betetzen dut. Ildo horretan, bakoitzak berea nola bete behar duen ez diot inori esango. Baina komenigarria da bake prozesuaren bilakaerari buruz bakoitzak izan dezakeen iritzia azaltzea».

Prozesu honetatik abantaila politikoak lortu nahi izatea egotzi zien indar abertzaleei eta PSOEri. «Beste indar eta buruzagi politiko batzuek beste kontu batzuetara bidera ditzakete euren ahaleginak. Baina jakin badakite, Espainiako Gobernuarekin,



ANGEL MILLAN / EFE

Jose Mari Aznar Espainiako presidentea, atzo Senatuan, kazetariei adierazpenak eginez.

ni presidente nagoela, ez dutela abantaila politiko bakar bat lortuko egoera honetatik. Ez dakit abertzaleek beste batzuekin lortu nahi dituzten abantailok», adierazi zuen Aznarrek PSOEri erreferentzia zuzena eginez. «Baina benetan nahi hori baldin badago, nahia adierazten duenak zein jasotzen duenak azalpenak eman beharko dituzte».

Madrilgo Gobernuak «benetako esperantza eta bake-errealitate bat» sendotze bidean ari dela defendatu zuen Espainiako presidente-

ak, honakoa gaineratuz jarraian: «Batzuk bakearen alde ari gara lanean eta beste batzuk, ostera, bakearekin zerikusirik ez duten ekimenen alde. Baina bakeak ez du preziorik, ez zaio inongo preziorik jarri behar, eta ni ez nago inongo preziorik ordaintzeko prest. Bakea sendotzeko ari da lanean Espainiako Gobernuak. Aldiz, beste pertsona batzuek beste kontu edo arrazoi batzuk direla medio egin dezakete lan, baina planteatu ezin daitezkeen kontu eta mugak dira horiek».

Almunia, ildo beretik

Joaquín Almunia PPrene Gobernuaren immobilismoa salatu du beste behin, atzo *El Correo* egunkariak zekarren elkarrizketan. «Alderdiok ez bagara gai su-etena sendotzeko, zaila izango da egoera hau luzatzea». Hauteskundetan garaile bada, egiten duen lehen gauza «Aznar eta Arzalluzekin biltzea» izango dela aurreratu du, eta «indar demokratikoak bildu azterketa komuna osatu eta estrategia bateratu batera ahalik eta azkarren iristeko».

Espainiako Estatuko herritarren % 51 presoak Euskal Herriratzearen aldeko da

Erredakzioa / Donostia
ESPAINIAKO Estatuko biztanleen erdiek baino gehiagok (%51,1 hain justu) «baiezkoa» erantzun diote ondoko galdera honi (Opina Institutuak *La Vanguardia* egunkariarentzat eginiko in-

kesta batean): «ETAko preso guztiak euskal espetxeetara eramango zenituzke borondate oneko keinu bezala?». Aurtengo urtarrilean, berriz, galdera horri berari %49,7k eman zioten baiezkoa, eta euskal presoak Euskal Herriratzearen aurkakoak ere gehiago ziren.

Euskal herritarren kasuan, berriz, Euskal Herriratzearen alde ageri direnen kopurua nabarmen handitu da, azaroaren 19tik 22ra bitartean egindako inkestaren emaitzek jasotzen dutenez: %76.

Espainiako Gobernuak iturriak aipatuz, atzo Europa Press agentziak jakitera eman zuen PPrene Gobernuak jada hasia dela euskal presoaren gerturatze bat aztertzeko. Hala ere, oraindik ez diote erabaki finkorik hartu. Ildo honetan mintzatu zen atzo Josep Piqué Espainiako Gobernuak bozeramailea bera, ezer berrestu eta alboratu gabe.

Xabier Arzalluzek berak adierazi zuen, Almuniaekin bildu ondoren, Eguberrien aurretik mugimenduren bat izan daitekeela.

Otxandioko Udalak Aldasororen askatasuna eskatu du eta Azkoitikoak Olalderena

■ Presoek Euskal Herrian bizitzeko duten eskubidea aldarrikatu dute

Erredakzioa / Donostia

OTXANDIOKO Udalak Ramon Aldasororen askatasuna eskatzeko gaur herriko plazan egiten den kontzentrazioan parte hartuko du. Azkoitiko Udalak gauza bera egiten du asteartean Luis Mari Olalde *Kinkela* preso libre uzteko eskatzeko.

Aldasoro Miamiako espetxe batean dago preso eta EEBBetako Floridako Gorteak euskal presoak estraditatzeko baimena eman du. Hori dela eta, Udalak hilaren 11n estradizioak «bakerako bidea ez duela laguntzen» argudiatu zuen, eta haren askatasuna eskatu du.

Era berean, Azkoitiko Udalak, EAJ-EA, EH eta PSOEren bozekin, Luis Mari Olalde ez dezatela Venezuelatik estraditatu eskatu du Madril herri horrek duen enbaxadan. Halaber, PSOEk izan ezik, etzi 19:30etan egiten den manifestazioan parte hartuko dute indar politikook Olalde askatzeko eskatzeko.

Bi udalak euskal presoek Euskal Herrian bizitzeko duten eskubidea aldarrikatu dute eta, aldi berean, prozesu politikoan parte hartzeko eskubidea dutela adierazi.

Voynet Ingurugiro ministroak entregak salatu izana txalotu du ABK

Erredakzioa / Baiona

DOMINIQUE VOYNETEK, Frantziako Ingurumen ministroak, euskal presoak Frantziatik kanporatu eta Espainiako agintariaren esku uztea salatu izana txalotu du Abertzaleen Bata-sunak. «Maila horretako politikari batek abertzaleek aspaldidanik erraiten duguna berrestea eskertzekoa da», adierazi du prentsa ohar batean.

ABK Frantziako beste agintari politiko eta hautetsiei eskatu die «Lizarra-Garaziko akordioaren izenpetzearekin ireki den prozesua laguntzeko».

Jose Angel	☐ Edozein gaixotasun tratatzen dugu.
Sarasola Lopetegi	☐ Haurdunak, haurrak eta helduak.
Mediku-homeopata	☐ Egidazu bisita.
Sendatu zure gorputza	
San Miguel plaza 1, 2-Ezk. - 20301 IRUN - ☎ 943 617861 - E-mail: angel1967@euskalnet.net	